



Inatsisartuni ilaasortaq
Jens Napátôk, Naleraq
Maani/

§ 37 naapertorlugu apeqquteqaammum nr. 008_2024 tunngasumut akissut

Inatsisartut suleriaasissaanni § 37-mi imm. 1 naapertorlugu apeqqutinik Naalakkersuisunut nassiusaqarsimavutit, aalisartut piniartullu inuuniarnikkut ajornartorsiuteqartut ikiorserneqarnissaat pillugu. Apeqqutitit uanga suliasaqarfigisannut akisassanngortinneqarsimapput.

Apeqqutit:

1. Aalisartut piniartullu 2023-ip naalernerani inuuniarnikkut ajornartorsiuteqartut ukiorserneqarnissaannik Naalakkersuisut neriorsuineranut maannamut piviusunngortinneqanngitsumut suna imaluunniit suut pissutaappat ?
2. Ilumut aalisartut piniartullu qulaani eqqartorneqartut ikiorserneqarniarpaat ?
3. Ikiorsiisoqassappat tamanna qaqugu piviusunngortinneqassua ?
4. Ikiorsiinissamut suut piumasaqaataassappat ?
5. Ikiorsiisoqassappat aalisartut piniartullu illoqarfinni nunaqarfinnilu sorlarni najungaqartut eqqartorneqarpat ?
6. Ikiorsiisoqassappat ikiorsiissutit qanoq annertutiginissaat aamma qanoq sivistutiginisumik ikiorsiineq atuutsinneqassua ?
7. qanoq suleriuseqartoqarniarpa ?
8. Ikiorsiisoqassappat ikiorsiissutit qanoq agguanneqassappat ?
9. Ikiorsiisoqassappat ilaqutariit meerartallit immikkut tapiiffiqineqassappaat ?
10. Ikiorsiisoqassappat ikiorsiissutit ineqarnermut kiassarnermut kallerullu inneranut aningaasartuutit immikkut ilanngunneqassappaat ?
11. Ikiorsiisoqassappat aalisartut piniartullu qimmiisa nerukkaatissaqartinneqarnissaat ilanngullugit ikiorsiissutigineqassappaat ?
12. Siunissaq ungasinnerusoq eqqarsaatigalugu taama ikiorsiisoqarnissaanik pisariaqartitsisoqalissangaluarpoq Naalakkersuisut taamanikkussamut periusissiamik suliaqarnissamut pilersaaruteqarpat?

Ulloq: 30-01-2024
Suliap normua: 2024 - 2144
Akt normu: 23830572

Postboks 269
3900 Nuuk
Oqarasuaat (+299) 34 50 00
Fax: (+299) 34 63 55
E-mail: apn@nanoq.gl
www.naalakkersuisut.gl

13. Ilumut Naalakkersuisut immikkut ittumik ikiorsiisarnissamut periusissiamik suliaqassangunik, periusissiassa qaqugu piareersimassanersoq Naalakkersuisut naatsorsuutingaat ?

14. Aalisartut piniartullu nappaammik eqqorneqartut nunatsinni sumiikkaluarunilluunniit ikiorserneqarnissaminnut qanoq periarfissaqarpat ?

Akissutit:

Siullermik apeqquteqaateqarninnut qujanaq.

Apeqqutit tamarmik aalisartunut piniartunullu tunngammata, aalajangersimavunga, apeqquteqaatit ataasiakkaarlugit akinagit ataatsimoortumik akiniarlugit.

Inatsisartut inatsisaat nr. 6, 20. juuni 2022-meersoq naapertorlugu, inuit kikkulluunniit Kalaallit Nunaani najugallit, ikiorserneqarsinnaapput. Tamannalu aalisartunut piniartunullu aamma atuuppoq.

Inatsisartut ukiarmi 2023-mi ataatsimiinnerminni ilaatigut oqaluuseraat akueralugulu immikkoortoq nr. 62/2023, tassunga ilanngullugu aalajangiunneqarpoq ikiorsiisissamut atatillugu 2024-mut aningaasanut inatsisissamut oqaasertaliisoqassasoq, tamannalu inatsisartut aamma akuerivaat.

“Aningaasaliissutit iluanni Naalakkersuisut Aningaasaqarnermut Akileraartarnermullu Ataatsimiititaliap akuersissuteqarneratigut aalisartunut, piniartunut nunalerisunullu aningaasaqarnikkut ikorfartuinissaannut piginnaatinneqarput, matumani inuussutissarsiornermi isertitaat silaannaap pissusiata kingunerisaanik piffissap sivikitsup iluani tamarmik annertuumilluunniit appariarsimappata.”

Decemberimi Naalakkersuisut aalajangiipput, Inatsisartut Aningaasaqarnermut Akileraartarnermullu Ataatsimiititaliaata akuerisaanik, ikiorsiissutinik assigiinngitsunik aallartitsisoqassasoq, ilaatigut qulaani pineqartoq, tassalu silaannaap pissusaata allanngorneranik patsiseqartumik ajunaarnersuartut ittumik pisoqarneratigut ikiorsiisoqarnissaa decemberimi 2023 sapaatit akunnerini kingullermi marlunni atuutilissasoq. Qinnuteqartitsinerlu aallartippoq decemberip 18-ani.

Qinnuteqartitsisoqareernerani paasinarsivoq, Qaanaap pigisaanilu, aamma Ittoqqortoormiuni silap pissusaata allanngorneranik patsiseqartumik ajunaarnersuartut ittumik tassangaannaq piniartut inuussutissarsiorsinnaajunnaarallarsimasut. Taamaallitutik piffinni taakkunaniit qinnuteqarsimasut, piumasaqaatit aningaasanut inatsisip oqaasertaani allassimasut naammassimallugit. Naalakkersuisut isummerput, Inatsisartut Aningaasanut- akileraartarnermullu Ataatsimiititaliaanut makku inassutigissallugit:

- *Inatsisartut Aningaasaqarnermut Akileraartarnermullu Ataatsimiititaliap akuerissagaa, Qaanaap Ittoqqortoormiullu eqqaani ajunaarnersuartut ittumik, silap pissusaata allanngornerata kingunerisaanik, pisoqartoq taamaattumillu qinnuteqartut immikkut tamarmik 15.000,00 koruuninik ataasiartumik tunineqassasut piffinni qulaani taaneqartuni,*
- *kiisalu suleqatigiissitaliamik pilersitsisoqarneranut atatillugu ersarissunik malittarisassiortoqassasoq qaqugu allaffissornikkut piniartunut, aalisartunut*

nunalerisunullu ikiorsiisoqarsinnaanersoq silaannaap pissusiata allanngornerata kingunerisaanik piffissap sivikitsup iluani taakku isertitaat tamarmik annertuumilluunniit appariarsimappata.”

Inassutigineqartut akuerineqareernerani qulaanii piffinni pineqartuni qinnuteqartut tamarmik tapiissutisipput. Amerlanerpaat 12. Januar ikiorsiissutisiassatik tiguvaat.

Ilanngulluguttaaq nalunaarutigissavara, kinaluunniit aalisartoq/piniartoq, Inuussutissarsiutigalugu aalisartut, inuussutissarsiutigalugu piniartut, inuussutissarsiutigalugu nunalerinermik ingerlataqartut aallarteqqinnissamut tapiiffigineqartarnerat pillugu Inatsisartut inatsisaat nr. 3. 21. maj 2004-meersoq §1 imm. 2” malillugu, inuussutissarsiumminut uteqqinnissani siunertaralugu qinnuteqarsinnaammat.

Ilisimatitsissutigissavarattaq - soorlu Naalakkersuisut aalajangiinerasut - Naalakkersuisoqarfiup suleqatigiissitaq pilersittussaammagu Naalakkersuisoqarfiit susassaqtut allallu avataaniit attuumassuteqartut peqataaffigisaannik, taamalilluni malittarisassanik ersarissunik sanasoqarniassammat, aammalu qaqugukkt allaffissornikkut ikiorsiissoqassanersoq aalajagiisoqarsinnaanngorlugu, aammalu sukkanerusumik sulisoqarnissaa siunertaralugu. Naatsorsuutigineqarporlu ukiup affaani siullermi suleqatigiissataq malittarisassamut siunnersuummik saqqummiussaqaarumaartoq.

Naggaterpiaatigut ilisimatitsissutigisinnaavara, tapiisarnermut inatsisit naleqqussarneqarluni naalakkersuisoqarfik suliaqarmat. Qulaanilu pineqartoq, tassalu silaannaap pissusaata allanngorneranik kinguneqartumik, ajunaarnersuartut ittumik pisoqarnerani tassanngaannaq inuutissarsiortoqarsinnaajunnaartoqarnerani ikiorsiisinnaanneq inatsimmik toqqammavissinneqarnissaa siunertaralugu. Naatsorsuutigineqarpoq UKA2024 inatsisissatut siunnersuut saqqummiunneqarumaartoq, immikkoortup UKA2023/62-ip oqaluuserineqarnerata malitsigisaanik.

Inussiarnersumik inuulluaqqusillunga

Kim Kielsen
Aalisarnermut Piniarnermullu Naalakkersuisoq